

Obraćanje visokog predstavnika Valentina Inzka na ceremoniji obilježavanja 14. godišnjice helikopterske nesreće na Prokoškom jezeru

Dvije različite vizije

Svijet se bitno izmijenio nakon 1997. godine kada su ovdje poginule naše kolege.

Bosna i Hercegovina je napredovala – presporo u nekim važnim područjima, ali ipak je postignut stvaran napredak.

Ali, dok se neke stvari mijenjaju, neke ipak ostaju iste.

Danas, kao i prije četrnaest godina. Danas, kao i za vrijeme sukoba. Danas, kao i u godinama prije sukoba, postoje dvije vizije onoga što bi ova zemlja mogla biti.

Jedna vizija je zapela u uvjerenju da se Bosna i Hercegovina nikada ne može osloboditi šovinizma i zlobe koji je već dugo opterećuju.

Druga vizija je sasvim drugačija.

U njoj su građani Bosne i Hercegovine isti kao i građani u bilo kojoj drugoj zemlji. U ovoj viziji, građani BiH razmišljaju i djeluju na isti način kao i drugi Evropljani. Oni se brinu za svoje porodice i za svoju budućnost. Oni žele da njihova zemlja bude sigurna i prosperitetna – žele da ona bude normalno i pristojno mjesto za život.

Dvanaest muškaraca i žena koji su dali svoje živote na ovoj

planini vjerovali su u ovu pozitivnu viziju – i zato su i bili u Bosni i Hercegovini.

Oni su vjerovali da ova zemlja može uspjeti i prosperirati – zbog toga što su njeni građani časni; zbog toga što su njeni građani talentirani; zbog toga što njeni građani imaju sposobnost da odbace neuspjeh i posegnu za uspjehom – kao i građani bilo koje druge zemlje.

Nažalost, danas ima nekih koji i dalje čame u tmurnoj viziji neuspjeha. Međutim, to ne mora značiti da i ostatak stanovništva mora propasti s njima.

Dvanaest kolega kojih se ovdje prisjećamo radili su na uspješnom oporavku Bosne i Hercegovine. Oni su *vjerovali* u taj uspjeh, a vjerujemo i mi. U nama, u našoj požrtvovanosti njihovom cilju, sjećanje na njih i njihovu viziju i dalje živi.

Odajemo počast Peteru Backesu, Liviju Beccacciou, Andrzeju Buleru, Davidu Kriskovichu, Leah Melnick, Charlesu Morpethu, Williamu Nesbittu, Marvinu Padgett, Thomasu Reinhardt, Jurgenu Schaufu, Georgu Stiebleru i Gerdu Wagneru.

Odajemo počast njihovoj žrtvi odavanjem počasti njihovom cilju.

To je cilj svakoga časnog građanina Bosne i Hercegovine – cilj oporavka, pomirenja, prosperiteta i mira.

Na ovom mjestu i na ovaj dan mi obnavljamo naše opredjeljenje za taj cilj i sjećamo se naših kolega i njihovih porodica koji su podnijeli najuzvišeniju žrtvu za ovu zemlju i njene građane.